


A Monthly Christian Magazine

AN ORGAN OF THE ZOU PRESBYTERIAN CHURCH SYNOD

Khristian Tangkou

Vol. 53 || No. 12

December, 2017



Editor: Rev. Stephen Chinzathang

Synod Kumpuon: **"Ga ding a tel ihi"** (John. 15:16)

Khristian Tangkou

Vol. No. 53 || Issue No. 12 || December, 2017

Editorial Board

Editor : Rev. Stephen Chinzathang
- 9863042789
ct_stephen@yahoo.com

Joint Editor : Rev. Khamchinkhai - 8730933744

Cir. Manager : Upa Jamsianmung - 9862086615
sianmung@rediffmail.com

Bus. Manager : Upa Kamgenpau - 8974612937
Shie T. Ginzahau - 8974438842

Cont. Editors : Upa S. K. Khama - 9856406454
Rev. Awnkhankhup - 9862828921
Rev. M. G. Nehlien - 09535042257
Rev. Kaimuanlal - 9862923960

ZOU SYNOD ULIENTE

- **Moderator:**
Rev. Mangsuanthang
- **Moderator Elect:**
Rev. Awnkhankhup
- **Secretary (Sr):**
Upa Sianzahau
- **Secretary (Jr):**
Upa Er. Thangchinmang
- **Treasurer:**
Upa Chinsuanthang
- **Statistician:**
Upa S. Nangkhanlal
- **Executive Secretaries:**
Rev. Stephen Chinzathang
Rev. Khamchinkhai

A sung thu

- Editorial..... 01
- Thu tuomtuom 03
- Jesu pien ding 06
- Immanuel 08
- Khrist Jesu a um lungkimna 12
- Va-ah..... 15
- Jesu seing zuon in 17
- Jesu bang a um ding ahi 19
- Hing na thumpi zel un aw..... 22
- Kipah thugenna & ZPWF Cumlumn... 24

Copies - 1100

AMAN

Kumkhat ah	- ₹	100.00
Post ah	- ₹	200.00
Copy khat ah	- ₹	10.00
Life Member Fee	- ₹	1,000.00
Patron Member Fee	- ₹	2,000.00
Memorial gift	- ₹	2,000.00

Thusuo zosie Editor leh Zou Synod
ngaidan ahi kimsih a, a suotute'n maw
a kipuoh chiet ding uhi.

Thusuo dingte Editor kung a pieh
ding ahi.



Editorial

Lemna Mangpa

Isai 9:6

Aziehpen ei a ding in nau a pieng a tapa pieh in i um ta hi. A liengkou a vaihawmna a kinga ta leh amin “Lamdang, thu moppa, bangkim bawlthei Pasion kumtawn Pa, Lemna Mang” a kichi ding hi. taang 7: Agam vaihawmna leh kilemna in tawp ni anei sih ding a David Mangtouphta tungah leh a Leenggam tung ah thu pe ding in vaihawmna leh thudihna suhdet dingin tuani a kipat kumtawn dong in galkapte Mangpa phattuumngaina in bawl ahi ding hi.

2017 December a hing tung ta a Khristian Tangkou simtute zousie Lemna chibai “ ka hing buh hi. Tam khovel gam muonlouna kitha kimat, kisuhgentheina leitunga kumtawp tung thei ding a Mangpa’n ahing mapuina ziehin Pa Pasion Mangpa Jesu Lemna Pasion min i phat hi.

Eite pen Rom 5:10 in tambang in agen a “Aziehpen melma ihi lai a bawn A Tapa shina zieh a Pasion toh kilem ihitah uleh kilem a i um zaw nua un, a hinna ziehin hundam in i um zawsem ding uhi (taang 11). Tuami guoh hilouin, tua kilemna hing musahpa i Mangpa Jesu Khrist ziehin Pasion ah nuom in i um uhi.

Laisiengthou in agen bang in, tukum Khristmas pen gingtute leh tami chibai buhna laisimtu zousie in Mangpa ah lungdam thu

tut vai. Tami hun hunloupi leh gingu nahina Mangpa Jesu pien hun thupitah a ama theizingna hun pen lungdam leh thanuom tah in Pasian pahtawina a hun zangin akung a chibai buh ding in kisakhawl chiet vai.

Mangpa Jesu pien hun Khristmas kichi pen val in khovel ah kipahna a um nawn sih hi. Gingu nahi leh na Mangpa lunghawl khu na mawpuohna thupipen ahing suohta ding hi.

Tua ahilai in tulai Khristiante pen a Khristmas Hagau Pasian in Vannei a itseng zieh a itna ahing pieh kipahna sang in eima mimal nopsahnate in hing nopzat i sawm zaw uhi. Ahin Lai-sien-thou en lei. Suolam mipilte, zawlneite leh Juda miten Pasian in ama uh a ding a bang ang bawl diei chi in Biehinn pi te leh laisien-thou te a sui in Pasian a nai tinten uhi.

Tuaziehin tukum nang leh kei zong hatangpin pang vai in Mangpa Jesu hing pienna hun Khristmas hun pen ahoi thei lam a Pasian toh kipawl a Pasian toisang ding in hanchiem vai.

- 1) Mangpa Jesu pien in kipahna ahing tun hi. Mangpa Jesu pienna pen Judia gam ah kipahna ang tun hi. Kum 400 vingveng Pasian a gammang te a ding in Pasian naina ang tun hi.
- 2) Mimawl leh Belam chingte kung ah Mangpa Vansawltah-te tami Khantanhoi ava tun hi. Ei mimawl leh kidah huoite a ding in zong tami hun pen Pasian toh kipawlkhawmna hun hoi ahi.
- 3) Mangpa thugousie in koima khentuom anei sih a nang mama Pasian toh umtawn ding a Pasian in ahing hatna hun hoi in gel in.
- 4) Tan vou det neilou tami i khuolzinna uh khawvel ah akoi akoi a ding in Jesun mun ahing siempieh ta hi. Nang a ding in tam Khristmas hun pen hun manpha in gel in len nangsang

a vangsie leh lungsim buoina neite kung ah tanchinnoi tutna
hun in nang leh na innsung miten zong zang un.

- 5) Tami hun pen gingtute leh Hattuom-te a ding a hun thoveng
Pasian nasepna Meithai, Taga, Zungawl vei, Khamthei bawl
innsung kibalzahte kung a Pasian silthonpieh itna hun nagente
hei hun leh hun lemtang na zat thei hun ahi chi manghil sin.
Tuaziehin Simtute na unpi un chibai kang buh hi. Mangpa
Vansawltah Belampute kung a Van lapawl saten nang leh na
innkuonpite tung ah zong lemna hing tungsakta hen.

Christmas chibai leh kinepna toh kumtha hoi na unpi uh kung
ah kahing buh hi.

.....

*Thu tuomtuom
leh
Thumpi dingte*



01. LUNGDAM THU GENNA: Pasian hoina leh mapui na toh
i thei loukal un kum leh hate hing liem zelin kholum khovot
hun, guozut daikai hun leh damthei dammaw hunte pal galkai
in kumtop tan meel mu thei ding a lametna lienpi toh hing
mapuitu Mangpa min phat kawm in akung ah lungdam thu
igen uhi.

02. Kipah thugenna: Pasion hoina leh mapuina toh kumtop tan meel mu thei dinga lam-etna lienpi i nei uh toh kiton in iki thuzahthuona uh Khristian Tangkou hachin a kisuo thu manpha tahtah Contribute hing bawlsahte leh Subscriber te kung ah kipah thu ka hing gen uhi.
03. EXECUTIVE SECRETARY KHUOLZIN HING TUNGTA: A peisa November 02, 2017 ni a “Council for the World Mission” (CWM) SEMINAR mang ding a CHENNAI khopi a kuon khie Mangpa’n i thumnate hing dawng in dated 6th Nov. 2017 ni in dam in hing tung kiata. Tu in Office ah a sep ding maban umte sempan kiata. Theme: Peace and Justice Inter Relationship.
04. KHRISTMAS HUISI LAANG PANTA: Pasion hoina leh mapuina tang touzelin mu ding leh tang ding a i kinepphah lou it leh ngai tampi ten mu nuom mama nanleh muphalou ei Khristiante dinga NIPOIMAW mama shi ding leh mangthai dinga i um lai a hing hundamtu pienni KHRISMAS amanpha theipen leh aloh thei pena Pasion hagau pawlna toh i pawlpi sunga Hattuum chin in thumkawm in lamchin teng ah kisa khol chiet vaui.
05. ZPYF LAKUTPI - 2018: Pasion hoina leh mapuina muong kawm in ZPYF Lakutpi - 2018 ahing tung ding January 11-14, 2018 chieng in zang ding in thupi tahin kisakhoh uhi. Lawching taha zah leh man ahitheina dingin bang hun ah zong thumpi chiet vaui. Thupi: “Khanglai Khrist adia gim namtui”
06. Pasion in A misiengthoute thumna hing dawngin Dated 03-05, November 2017 sung in Presbytery lienga khawmpi-te kizang zouta hi.
 - 1) Manipur Gam Presbytery (MGP) a (62) veina Amun: Presbyterian Church New Zoveng
 - 2) Manipur Eastern Presbytery (MEP) a (51) veina Amun:

Presbyterian Church Khuainuoi

- 3) Zoutang Presbytery (ZTP) a (10) veina Amun: Presbyterian Church Hiangtam (B)
07. Pasian umpina muongkawm in ang tung ding December 15th-17th 2017 tan in a 36th veina General Assembly Presbyteriah Church of India Gospel Campaign Imphal ah Manipur Meitei Presbyterian Singlup Synod ah um ding hi. Ei Zou Synod apat in Palai 10 (sawm) va pang ding uhi Thumpi chiet vaui.
08. A (14) vei Zou Synod Kum sim khawmpi
 - i) Amun: Presbyterian Church Zomi Colony (ZPCS)
 - ii) Ahun: 30th Nov. - 03 Dec. 2017
 - iii) Thupi: "Ga ding a teel ihi" Jn. 15:16
09. Kumtawp kuon a ding ihina utoh kiton in Synod etkawlna nuoia Mission School a sem Sangsyete leh Sangnaupang final exam nei ding hi ua, ang lawchin chiet na ding un ana thumpi chiet vaui.
10. Dated 14th November 2017 (Children's day) niin Young Learners School Staff te leh Student ten ZPWF etkawlna nuoia a Tunnu Liimbel (Orphanage Home) vena leh panpina piehna hing nei uhi. Amauh ten REACH OUT AND TOUCH Project tungtawn in Rs. 10,000/- leh Certificate piehna zong nei uhi. Tualeh Gideon International Churachandpur ten zong Bible piehna zong nei uhi. Mangpa'n amauhte atamzaw sem in guolzawlta hen.

.....

JESU PIEN DING ANGELTE GENLAWHNA

(Taangtel: Luk 1:26-38)

- Upa Chinthong
Tongdam

Adam leh Evi suhkhielna zieh a, Pasion lungthahna sala tang a kumtawn gotmun a um dinge tandoh ding a Van khopi sunga mi akisui leh koima aum nawn lou ziehin Jesu ma ang pei a ngaita Jawlneiten anagen bang in hun le nite hing pei zelin Nazareth khuo a Nungah siengthou Mari sung a pieng ding ahi chia Mari ava houlimpi uleh Mari alungkham mama ta, tuathu azahtah in bang chi bang guolzawlina atadiee ang chidohta. Luk 1:29.

Angaituolou lamtah in ahoupita hing gaivachin tapa khat nei va chin amin Jesu nasa ding Luk 1:31-32 achileh Mari lungkham seng in Conviction aketa nang hile chin bang nachi diei? Ei kihileh zong kibuoit houva, Nungah siengthou zumthei mama alungtang a zong angaituo khahlou pasal bei a gai ding chipen chimultho zong huoi zoken va. Mari zong azau in azautho. Mari zausin hing gaivachin tapa khat nanei ding achi.

MARI LUNGKHAMNA POINT 3 TE:

- 1) Nungah siengthou ahizieh: Nungah siengthou ahi guoh hilou a min zong a siengthou mama ding a agintat akhosung ua umdan hoipen apa bei a gai ding chipen mihing ngai a zong melse mama nungah duhdahloute bon azol gai leh zum a Doctor a nausukhie nalakoma nauangeh kipai um, Mari bang dia lungkham lou ding e.
- 2) Mitoh kichiemsa, ngaizawng neisa ahizieh: Tangval Joseph toh kiteng dinga kichiemsa Luk 1:27 Joseph toh akiten ding chauh ngah a um Angelte thugen pen zahnop huoikhol lou ding ahi.

Gai pouppou le lah Joseph in kitenpi dia agintat lou, agintatlou dungzui a Josephin aguh a kikhenpi som nalai. Joseph zong oimaw huoilou ingaizongten ei a hilou aguh a naupai ding chipen ngaisiem huoilou ahi. Mari deitelna buoi huoi mama chini kalah a ding ta. Jesu leh Joseph asaikah Angelte thugen apom leh Joseph atan ding Joseph apom leh Jesu atan ding leitung sil leh Jesu neikhom thei ahilou zieh a khat zawzaw ataan a ngai.

Mari dinmun buoihuoi mama na tang khatai? Hagau siengthou apat lungkhamna na neitai? nangma a hundampa apienna ding ah hoitah in ngaituo inla thupuana bawllou in hagau siengthou nuasawl sin. Tamte ziehin nangma a hundampa pieng ding subuoi sin.

3. Mitaga migenthei ahizieh: Amalah milien ahiding a Tunngunngpen tapa akichi ding Luk 1:32. Asunga pieng ding lah mithupi amalah migenthei hingal, milien, milal, mithupi hizat lah a kei migenthei sung pen taha apien ding achileh alung sim buoi in kisuonlana ngen in adim a Angelte thugen zong apom ngampai sih. Pasian bangkim bawlthei umlou umsahthei aumsa zong lamangthei ahi. Theinapia bang dinga hichi buoi e? Jesu koi ahi a theichienlou zieh a ama zong kitheichienlou ahi, atop ah lungkham seng in Conviction aketa tami bang chi hithei dingla pasal la neilou ing a ang chi dohta. Angelte thugen theisiemlou a abuai deudeu phet in Angelten Counselling abawl khum a midangte Testimony agenkhumta. Na sanggam nu Elizabeth en in ta neilou a ching ahia, ateh nung in nau apai a ha 6 achingta Luk 1:36 achileh thakhat in alungsim akihong a hagau siengthou nasep theidan ang theisiemtah in pasal bei a naupai ding Pasian a dinga bangma ahilou dan ang thei kheta kipahtah in Angelte thugen ang dong a nasuohnu ka tung ah

nachi bang in tung taken na lawlaw hing lawtan Luk 1:38 chin ang ki sarender ta, Mangpa koi ahi ang theichien tahin Pasian a dia bangma ahilou dan atung a thuneitu Pasian ahidan ang theidohta, Pasian in Mari dong sese lou a a ut leh agaisahthei hinapin akiphal sieng masang in atung ah na asemsih a kiphah siengtah in na asempa a nau ang pai pan ta hi. Kiphalsiengna apoimaw mama ahi. Elizabeth in akipahpi mama a Joseph in aguh a kikhenpi asawm laitahin Angelten Joseph Counselling abawl a Joseph Mari kitenpi ding zausin hagau siengthou apat gai ahia, tapa khat anei ding a amin Jesu nasa ding Math. 1:20-21. Tuachin Joseph apai a Mari akitenpita.

Mari adin kipah umtei va maw. Joseph leh Jesu aneikhawmta Marin akama agenlou vang in Jesu zala Joseph atansa ahi. Jesu zal a Joseph atan ngam ziehin Jesu leh Joseph aneikhomta, Pasian gam zieha a inn alou, anu apa a sanggamte azi atate nuasie ten tu leitung damsung a azat tamtah mube lou ding leh khonunga kumtawn hinna tang lou ding koima aum sih Luk 18:29-30.

.....

I M M A N U E L

(Isai 7:14; Matthiu 1:22-23)

- Rev. Dr. Hangpi Manlun

1. Thupatna.

Awleh amasapen in Pasian mapuina toh kum 2017, Khristmas lamdawntheita ding a hinna damna hingpetu ibieh Pasian min iphat masa uhi. Tutung in “Immanuel” chi tungton in ikikum ding uhi. Tualeh i Bible uah tami thuteng khu thum vei atuong hi. (Isai 7:14; 8:8; Matt.1:3). Tualeh Hebrai ham a geldan ah “Immanuel” chi ahi. Greek hamin Thuhunlui a lekhieh masapen

Septuagint-ah ahileh, “Emmanuel” chin akigel hi. Tami bang in Mathiu geltu khun, “Emmanuel” chin ang gel hi. Abangteng hijong leh abulpatna “I ahisih leh E” akipan khu aumzie kibang ahituohthuoh gel hi. Tami Immanuel chi thu imu masahna uh ahileh Jawlnei Isai in Jesu pien masang lai kum 700-velin Jesu min ding a anamaget min ahi.(Isai 7:14; 8:8). Tualeh Mangpa Jesu ang pien ding laiin Angelin Mari kung ah Jesu min ding in ang gen kia hi. Amin umzie ahileh “Pasian i kung uah aum” china ahi. Tualeh Bible a min kiphuohte khun meaning anei chiet ua, tuabang in Jesu min kigen khat khu tami ‘Immanuel’ ahi. Bible hilchientu loupitah Dummelow in, “Min ahina a, title ahizaw hi” ana chi hi. Tuaziehin Jawlnei Isai in amin ding in Emmanuel na hisah ding uh chia anamagen khu Mangpa Jesu hina toh jong akituoh mama hi. Van Mang tapa, mihing a ahingpien thute, mihingte lah a Pasian hing umdante genchetna ding in Immanuel chia anaphuoh khu adih mama hi.

2. Tuin Pasian in lampi tuomtuom a mihingte ang umpi dante isuiding uhi.
- 2.i). Eden huon ah Pasianin amisiem masahpen Adam leh Evite akoiin ana umkhawmpi jing hi. Ahin, Adam leh Eviten Pasian thupieh nuolin anapalsat ua nehlou ding singga anehta ziehun Pasian toh umkhawm thei talouin Eden huon akipatin nawmang/hawlmangin ana umta uhi. Ahin Pasian in Abraham toh thuhun (covenant) aneipi a, tuachin tami thuhun azui chiengun Pasian toh ana kipawl thei uhi.
- 2.ii). Tualeh Pasian khu Mosi kung a akipuon laiin jong, “A umpa kahi” chin akigen hi. Pasian in Mosi kungah, “Tualeh munsienghou hingbawl pieh uheh, alah ua ka ten theina ding in” (Potdawnha 25:8) achi hi. Tuachin tami munsienghou tungtonin amite lah a umta hi.

- 2.iii). Tualeh Israelte lengte khang/hunlai ah jong amite lah ah ana umthu jong imu uhi. Tambang in Thuhunlui hunin ami Israelte toh ana um dan imu uhi.
3. Awle tuin Pasian ikungua aumdan isui ding uhi.
- 3.i). Johanin achilin thu aum a, thu khu Pasian toh aum a, thu khu Pasian ahithu agen hi. Tami thu khu i Mangpa Jesu genna ahi a, achil akipat a Pasian toh umkhawm a, eite khelna leh gitlouna akipat ahingtan ding ahing pieng ahi. (Johan 1:1-14). Tuachin mihing lim-le-mel puoin tami leitung ah kum sawmthum-le-thum ang um hi.
- 3.ii). Sawltah Paulin jong Mangpa Jesu khu Pasian hingal, mihingte tan ding a suoh bang a hing pieng ahithu agen hi. (Philippi 2:6-8).
- 3.iii). Tualeh van akatou nuain jong leitung a umlaia, agen bangin Hagau Siengthou in Pentecost nin leitung ah ang kum suh a, tuni dongin gingtute leh hattuumte ahing umpi in ang hamuon jing hi.
- 3.iv). Tualeh Kihilna ah, “Kei Alpha leh Omega ka hi. Mangpa Pasian aum lel, umkhinsa leh hing umdingpa” chin jong akigen hi. (Kihilna 1:8). Amakhu bang chilaipou in jong aum jingpa ahi hi.
4. Ei mimal leh innsungte ang umpidan sui kia va-ui. Tam atung a igente ban uah Mangpan eima mimal chiet leh i innsung chiette uh ang umpidan leh puihuaidan ingaitua leh siltamtah imuchiet ngei ding uhi. Tumasang kum sawmni leh sawmthum lai a na mimal hindan leh na innsung umdante nua etkia lechin Mangpa hingpui dan leh guojawl dante lamdang tah in na mungei ding hi. Laphuohtu in, “Aw Mangpa kei koi ka hia, ka innsung mite

jong bang ahia tamtantan a nangguoljawl” chia a kipah seng a bieng a luonhi luong akap atamta hi. Tamte ingaitua chieng in Sam gieltu gen bang in “Mangpan saltangte Zion a ahing nuo puikia laiin, mang mantute bang ihi uhi,” achi khu idinmun uh ang hiphialta hi. Halehluiah Mangpa’n loupina tangta hen! Tamte khu Mangpa umpina leh puina jiehbou ahi hi. Tuaziehin imimal hinkhuo, i innsung mama uah jong Pasian umpina nasatah itan ziehun aminloupi iphat sonson uhi. Tualeh amadeibang a hinkhuo izahtou jel ua ikalsuon jing nahpou uh leh Mang Immanuel in imimal hinkhuo leh innsungte uh tusang a thupijaw in ang umpi in angpui ngei ding chi ipuong ngam uhi. Tuabang muthei leh tangthei ngei ding in thumna toh panla jing va-ui.

5. Kumtawn kumtawn in Mangpa khu ikung uah um jingta hen aw.

Awle imanghillou ding khat uh ahileh Mangpa khu tu idamsung maimai ua ikung ua um ding ahisih a, ama gingta a hinna neite khu ashinua chieng un jong kumtawm kumtawm a Mangpa kung a khawldam dingte jong ihi uhi. Tuaziehin tam leitung idam sung ua Mangpa ikung ua aumlou a, eite jong Mangpa toh iumkhawl jing sih uh leh na shijou chiengin na hagau Mangpa kung ah akhawl dam sih ding hi. Tuaziehin unau ittah aw tu na damsung ngeiin Immanuel toh zawhkhawm, vahkhawm jing ding in iki ngen sawnsawn uhi. Tuabang hileh tam na leitung khuoljinna na jaw chieng in na hagau khu Emmanuel kung ah a khawl damta ding hi. Mangpa’n simtu zousie hing umpi in hing guoljawl jingta hen. Amen!!!

.....

Khrist Jesu a um Lungsim

- Rev. Awnkhankhup

Bang ding a Pasian ta kichi ei Jesu Khrist nuazuite lungkimtheilou, kipahtheilou leh hattheilou ihi uoi chi dohna poimawtah hingei va chi a gintathuoi hi. Mawltah leh a tomlam a dawng ding hita lei, Jesu a um bang lungsim i neilou zieh uh ahi i chi ding a lamethuoi hi. Tuabang lungsim i neilou zieh a i hinkhuo nuomtheilou, i innsung leh i khotaang uh chidam theilou, thamlou a i Khristmas zah zong nuom theilou ana hi pen zel hi. Tuaziehin, Khrist Jesu a um lungsim khu bangtaw bang lungsim hi mawngmawng ahiei chi i enkhawm ding uhi.

1. KHIEHLA NEILOU LUNGSIM: Pasian toh kibang a umna dinmun a san dingdan mihing lungsim pilna in a bat zoulou khop a sang leh khietla huoi dinmun ahi. Hinapi in, Pasian tapa Jesu Khrist in tuami dinmun sang leh khiehlahhuoitah hing taisan in leimun niempen a hing teal zaw hi. Tami ahi leh laphuohtu in “Thu lamdang ka gen chimtheilou’ ana chi khu eite pen, eima phatoh chiet a ihinate uh zong taisan ngamlou in, a hoizaw leh sangzaw dinmun leh hinate del in hun chin in i tai un, bawlthei bawlmaw bawl in Pasian deilou sil tampi ibawl kha theizel uhi.

Bethlehem a Jesu pien lai in zanlai a gamlah a Belam veng a um Belamputen a mau a ding a hundampa pieng ahithu a thei

tah un, a Belamte uh peisan in nausen Jesu chibai buh dingin a zan azan in kuonkhie uhi. Galilee lui a nga man a kivah Peter te, Jesun a nuazui ding a ahat lai in a lente uh nuasie in Jesu zui ngal uhi. Nang leh kei in ibangte peisan in Jesu chibai ibuh diei? I hina leh i dinmunte, i nei ilamte peisan a Jesu zui a ngaihun tam mama hi.

2. KIPIEH PHALNA LUNGSIM: I Mangpa Jesu'n, khietla ding tampi a hing taisan ngam ban ah, mikhiel eite a dingin ahinna, a hatna leh a hunhoi zousie ahing pie hi. Tuami kiphalna lungsim nei masapen Suolam mipiltan a goubawmte uh - Sana, Dangka leh Gou sil manphate tawi in nausen Jesu va bia uhi. Tuni in eiten bang i pepthal ei?

Nidanglai deu in Khristmas vaidawn a, voh leh bawng tuoh ngam bang ana tam zel a, tua hun lai in Khristmas leh Kumtha lopna Programmete a tangpi in ana nuom thei mama hi. Tuni hun chiengin, eima innkuon khamval ding thawkhah ding zau ngentang kihileh kilawmta a, taga leh meithaite piehkep ngap zong ki-um zou nawnlou suohta hi. Tambang a kiphalna neiloupi a, alouthei lou ahiman a ipieh khawmte uh i Pasian a dingin zong a namtui dingza in namtui zoulou hikha ding hi. Mi kiphah leh kipengam ihing tam chiengin, Hattuum nasepna tuomtuomte hing hat ding a, Khristmas tanpha hing nuomta ding hi.

3. KINGAINIEMNA LUNGSIM: Pasian toh kikim a um Jesu khu, ama le ama hing kikoi ngiem in, suoh bangin ahing um a, mihing bangin a hing pieng hi. Gingtute pen kikoi ngiem lam sang a, hithei liei hileh i hina sang a sang zaw deu a um ut ngentang ina hikha zel uhi. Mangpa ka sangseng nalai hi, hing nen niem in a chi chi ding a hoi vive ihi uhi. Lungsim kingainiemna panglou in Bethlehem bawnginn a kingainiemtah a hing pieng nausen Jesu kimuthei ngailou ding hi.

4. THUMANNA LUNGSIM: Mihing ten hasa isah mama uh leh i zaw zou lou khat uh khu thumanna ahi. Laisiengthou in nu leh pa thuman khovel a damsawtna ahi ana chi a, thumanlou ziehin lei a damsawt zong ki um nawnlou phiel ahita hi. Tuni a Jesu nuazui kichi ei gingtute zong innsung, khotaang leh Hattuum pawlpi ah thupieh zui ding i masang a umte thumangtah in i zuizel na uai chi kidohtham ching mama ding hi.

I Mangpa Jesu thumanna pen, a tepi ding dang umlou thumanna bukim, shitan dong a thumanna ahi. Innsung a kithuman lou, i umna khotaang hoina ding a zui dingdan umte zui ding a thumang ngap ki um lou, Hattuum pawlpi in a bawl thupass te bang zui sawm ngailou gingtute ina hi zel uhi. Tambang a thumanlouna leh helna lungsim toh Khristmas i manzel zieh in nuom thei tahtah lou hi.

Mangpa Jesu hing pienna ding a thu hing mang Joseph leh Mary-te thupi in ngaisang huoi mama uhi. Kiteng ding a kikham lai, tambang a Vansawlsieng apat thupieh ahing umtah a gen-ha sese lou a, zum huoi seng va talawm in chihetlou a, tungnung pen Pasion lemguot ahi chi thei a, thupieh a manna uh etton ching mama hi.

Thuzawna: Khrist a um lungsim khiehla neilou lungsim, kiphalna lungsim, kingainiemna lungsim leh thumanna lungsim a i nei chieng in Khrist bahna a khangthei gingtu i hing hita ding a, i innsung leh i Hattuum sungte uh ahing nuom panta ding a, thamlou in a Khristmas leh Kumtha mante uh zong ahing nuomta ding hi. Tam bang hilou a, a lelam a Leeng Herod lungsim pua a, thangsietna lungsim gumnaw lungsim leh tuoltha ngapna lungsim i nei leh pen, i umna mun pouma gawtmun suoh van, mi genthei leh lungsiethuoi pen ihi zing ding uhi. Tuaziehin Khrist a um lungsim eima ah zong umсах sawm tinten va ui.

.....

VA - AH

Va-ah te en vawi un Bu atusih ua a at sam sih uh. bupang, Bu inn bangzong anei sih ua, hinanleh ama uh avah ngal a, noupen Vate sang in na manpha zaw uh (Luke 12:24). Va hoi leh kilawm tampite lah ah Va-ah pen khoi din zong etla huoi lou pen leh deihuoi lou, phattuumna neilou pen hi in akilang hi. I va ngainat loupun uh zong ahi mai thei hi. Deihuoilou Va-ah pen a vom kei kuui a, aumkhawm uleh zong leengkawm zelte a leengkawmte uh zong muh nop huoi senglou ahi ban ah alunglen huoi sih hi. Arong (Colour) un zong a hing hip sih hi. Film bawl ten zong azauhuoi lam ah va-ah atelsah deu gige uhi. A hing ham chieng un zong a haam duah duah ua, alung len huoi sih khop mai, i et chien deu ngel leh tampi umkhawmte lah ah zong etlah huoi deu chi ding a um vawt sih hi. Ninhuoi: Atam na mun ah a ninhuoi mama mai ua, a gongsan nalai ua, a thasie ua, Apite sang in atalte a thasie zaw nalai uhi. Vate lah a mihingte subuoi pente va-ah ahi. Va-ah tamna mun a zingkal a niin tunkhawm a umte bang innpuo a i kholkhawm chieng in ana tukeh in neh ding ana sui ua, thaang nengnung in a nuosie zel ua, ninhuoi leh huot huoipi ahi uhi. Vasa dangten ang subuoi sih ua, khenkhatte ngel ennuom mama nan lei zong muphah umlou/utlou ahi uhi. Va-ah ahileh va dang teng sang in ninhuoi khop in munteng ah um phiel uhi. Racist: USA hamkam lar mama khat “Racist” chi ahi. Eima meel ki sutpi/batpi loute huotchi ahi deupen mai. Va-ah pen a racist mama a, zingkal a bag vom leh ngou innpuo a i koikhiet leh a ngou pen ana tu keeh sieng ua, bag vompen akhoi ut het sih uh akichi hi. Ama uh toh kibang deute akingaideu ua, aki diemdeu uh zong himai thei uhi. Du lou neilou: Va-ah in neh utlou zong anei sih uhi. Huchi khop a dulou neilou leh poisah neilou ahi ua, a tuoh pouma uh nethei maite “anytarian” ahi mai uh. Va khenkhat theiga mai ne a um ua, khenkhat

pen “SA” mai ne a um ua, khenkhat leuleu Paahzu dawn a, napatee, ne a um uhi. Va-ah ahileh khumbang ahi sih a, a tuoh teng ban neh a bang phiel hi. Khumzieh in eima ki-etkawlna lam leh sienthoua lam ah Va dangte sang in atuontuol mama hi. Phatuom lou: A phattuom lou seng zieh ahi ding va dangte bangin a kikhoi lam thei in umlou hi. Sahuon ah zong Va-ah khoi in aum ngai sih hi. Zomi te tangthu khat ah tuolvung han din aki volunteer samna a, hinanleh a hat ding dan a chiin leh asiemlou zieh in VAHUI a sawl zaw uhi. Bangma dia phatuom lou ahipen mai (Leviticus) ah Juda a din Va-ah sa neh sienglou akichi hiel hi. Huchituh a deihuoi lou leh ngamat huoi na um lou ama a kilawm na leh dei huoina himhim umlou ahidan Mangpa Jesun zong thei thou ding hi a Bang zieh a va-ah pentah gentena ahing zang mawmawh ahi diei? Mihingte pen i lungtang hoilou pum lum lah ding umlou, du-amna, huotna, kisahtheina, angma sielna, dihtatlouna leh dugawlina adim. Va-ahte sanga kidah huoi leh etlana ding himhim umlou, himananlei damsung khosahna neh leh tah suina leh sil tuomtuom ah i mangbang in, i bei dong a, lungkhamna ding tuomtuom nei in i thawmhau hun atam mama chi Jesun a thei ziehin hing hamuon ding leh hamuon huoi dan genna in a tung a i changtel (Luke 12:24) na ah, “Va-ah te ngaituo un amauhte sang in na manpha zaw uh” ana chi hi.

Ruth Messenger: May-June 2017 issue apat lahsawn.

.....



Khristian Tangkou
simtute zousie
Khristmas chibai !

JESU SIENG ZUON IN

Tam thu giel theidia hepina leh itna a hing kem Pasion min phat kawm in a tung ah kipah thu igen hi.

I Pasion hoi hina mai zen e: Mihingte Pasion in tambang lawm a hing it lamdang in thupi seng hi. I hoi zieh ahi diei? Hilou hiel hi. Ama toh kibanga ang siem ihiman un bang zatah a khiel, mawl hinanlei zong hing it veve hi. A tapa neisun itlou kei in ikhelna zieh a shi ding a i um lai in, a tapa in hing suikhie hi. Ama ngaisah lou a um na lai mawh ding imah? Hepina hun abei ma in ama zuonmeng in. Khrist sisan manpha a thawn in luongsah sih vaui.

2. Bangma loup i kiliensah nalai ding maw? Jesun nang leh kei ang it ziehin a thupina teng koikhie in Bawng inn niemtah ah mihing te bang in a hing pieng a, mihing te deilou leh pampai, simmaw leh nuoise a um in nang leh kei zieh in Khross ah i khelnate ngaidamna ding in a sisan tampi seng in ahinna apie chi i thei nung a zong Ama ngaisah lou a pampai nalai ding ima? Ki ngaituo hunta hive aw unau...! Jesu Khrist ka hundampa dia ka saan ma in bangma loup i ki letsahna lienpi ka nei hi. Nu leh pate zatat louna, kidei khopna kidehzawlouna, dihtatlouna in hun kana zang a, ka hinkhuo ase mama hi. Nikhat ka nu'n "Ken vang leitung ah kipahna ding ka nei non sih" ahing chi a ka lungsim in ka nu'n hing muong hina va ia e, kei ah lam-etna lien nei hina mai e ...! ka ngaituo a, ki siemphat ka sawm a, Pasion ngaidamna thei chienloup i a hoi sawm pen sawt a dai zou mama sih hi. Hinanleh Pasion zangaina ziehin 8th February 2017 niin Jesu Khrist ka Mang leh hundampa din kana sang a, Pasion

ngaidamna ka theichienta hi. Khumi ni apat in dihtatna a kibulphu thana um in, ka pumpi ka lungsim leh ka hinna kei a hita lou, Jesu sisan a leisa Pasian ta ka hing hita hi. Ka hinna kei ut dandan a zang non lou in ka bawlthei khamkham Ama nna sep pen ka mawpuoh ahing hita hi. Unau tam leitung silte kidaal sahsah lai ding na maw? Leitung thupina leh apallun na sawt dai mawngmawng lou ding hi. Lei gou tampi kaikhawm in kholvum nanleh chin zong i shi chiengin i keng tuon sih dia, i shi san lel ding hi.

Leitung a mi hausa pen, pilpen Solomon in “Bang teng bangma lou ahi” ana chi ngal leh eilawi mi zawng leh genthei hinapi a, Pasian bellou, nailou, zau zong zau lou, i ut-ut a i hunte zangte ihi ua, zum zong zum huoi hilou maw...? Bangma hiloupi a kiliensah a, kisathei pen niem ki-etna hiel i hi dan muchien din Mangpan i mitte uh hing suhvah sah leh uthuoi mama hi.

3. Na khelna kisahtheipi na lai ding maw? I Mangpa Jesun hasatna leh lungkhamna chinteng thuoh in a sisan manpha a Pasian thangpaina apat a hing tat ihi, khum ziehin lungtang khausah a, khamthei, guithei zu leh sa a buoi in. Ama hing tatna ngaisah lou leh ki liensah taha na hun nei laite bangtan zang nai lai ding la? Na khelnate kisia a Jesu sieng na zot leh mi vangpha pen na hing hi ding hi. Hinanleh na khelna kisia a na topsan nuom sih leh mi hepi huoi pen pen na hi dia, na hinkhuo ah kipahna tahtah nanei sih ding. Tam tana bei lou in na shi nuo chieng in gotmun hahsatna chinteng mun ah na um ding. Na kisia panpan ding hi. Tuaziehin unau kingaituo in awl-in, dachieng chi sin. Na kumte ahing tam hiei hiei ding a, na tahsa leh ngaituonate ang chau deudeu ding a, “Dachieng na chi leh pen kikhel thei hi. Jesun nang hing ngaah zing hi. Ama zuon meng in” ka it aw ka sieng hing zuon meng in chi’n hing han zing hi.

.....

BIBLE STUDY

“Jesu bang a um ding ahi”

- *Upa Khupsuankham*

I Johan 2:6: “Koi in zong Pasian toh pumkhat in ka um hi achi leh Jesu bangin a um ding hi”.

I Bible tang sim in gingtute khu Mangpa Jesu banga um itup ding uh ahi chi ang hil hi. Pa hoitah nei tapil photma in a pa umdan a et chiengin a pa umdan banga umkal angahla mama hi. Khristian hinkhuo a siltup leh ngim sangpen khu “Mangpa Jesu bang a um ding khu ahi”. Rom. 8:29 ah. Pasian in hundam tate khu “Ama Tapa banga umding in aguotlawh hi. A tapa khu unau tampite lah a ta masapen ahi theina dingin” chi imu hi. Tualeh IPet. 2:21 ah zong “na zui ding uh, etton dingin Khrist a ketot khap hing nuasie in eite sih-le-tang in ana thuohta hi” chi imu hi. Tualeh Eph. 5:1 ah, Pasian ta deitahte nahizieh un Ama umdan la un chia hilna imu ihi.

Khristiante umdan ding tungtang ah gendan tuomtuom leh kihatna tuomtuom tampi um nanlezong atom lama gen in sil bangkim a “Jesu banga um ding” chi ahi. Jesu khu khelna malmal neilou, Pasian tapa siengthou ahia, eite pen suola pienga, hepina zieh a hundam tang ihia, bangchin eite Jesu bangin i umzou mawh diei! chia suonlam bawllou a, Heb. 12:2 in “Jesu mittuhn’a nei a, Ama hin banga hin itup ding uh, Ama gamtat banga i gamtat ding uh, Ama dei banga idei a, Ama bawl bang ibawl ding uhi. Tam khu gingtute hinkhuo a tupna sangpen leh Pasian hing deisahna sangpen ahi. Mihing khu koima etton tah i um sih ua, aketot a zui tah zong i um sih a, tualeh khumpa, tuami nu bang in um un chin zong thu ang pesih hi. Hinanlezong Mangpa Jesu banga um ding in thupieh kichientah imu uhi.

Amai ah Jesu ibahna ding uh Ama banga i um na ding tungtang bangza ahei itahlangta a, tuate khu koipou in hoitah a ngaisut dingin iki deisah uhi. Jesu khu tahsa dan a (Joseph sisan a pieng ahisih a, a Hagau siengthou silbawltheina a pieng ahibou hi). (Isai. 71:4; Math. 1:25; Luk 1:35). Nang leh kei zong Hagau siengthou a (Pasian) a ipien sih uleh Pasian gam lutlou ding hihai chi Johan 3:3,5 ah kichientah in imu uhi. Mangpa Jesu hoi tah a hundampa a pomte khu sisan a pieng hilou, mihing deisahna pieng zong hilou hinanlezong Pasian a pieng ahizaw uhi, achi khu Jesu ibahna masapen ahi. Jesu'n Jordan lui ah Baptisma atang chi, Matt. 3:15,16 leh Luk 3:21-22 ah imu hi. Jesun Ama gingtate baptisma tang dingin thu apie a (Math 28:18-20) tuami dungzui in gingtu masa ten ang semtou zel uhi, chi nasepte ah imu hi (Nas. 2:41; 8:12; 10:48) leh a dangdang baptisma tan ngaisih nachi leh na chikhiel ding hi. "Baptisma tan khu Jesu toh kipumkhatna etsahna leh suol shi sanna etsahna ahi ziehin baptisma tanglou in a ensah thei sih uhi" (Rom 6:1-4) tam khu Jesu batna leh Jesu banga umna anina ahi. Phil. 2:5-8 sung i etleh Paul in gingtute khu Khrist a kingaangiemna lungsim khu nei vesam dingin deisahna thu apie hi. Jesu'n kingaangiem tah a Pasian banga aum masie mihing banga ang pien a suoh banga, thu ang man a, mikhiel hi vawtloupi mikhiel banga singlamte (cross) a ashina tangpha ang thuoh ngapna lungsim nouman zong nei un, achi hi.

Ephesa 4:32 ah Pasian in Khrist zieh a noute ang ngaidam mabang in, noute zong kingaidam tuo chiet un, chi i mu uhi. Singlamte (Cross) dawn ah Jesu'n Ama thattute dingin apa kungah ngaidamna angetsah a, tualeh i thum chiengin, "Ka tung ua khielte ka ngaidam mabang un, nang zong ka khelna uh ei ngaidam in" chi'n ingen uh poimaw mama leh Ama um banga i umna ding ua poimaw mama ahi hi.

Ephesa 5:2 in "Khrist in ang lungsiet a, eite a dinga ang kipumpieh bangin noute zong lungsietna ah um un" achi hi. "Ken noute kang

lungsiet mabang in, noute zong khat leh khat kilungsiet un” chi i Mangpa Jesu Khrist thupiehtha ahi (Johan 13:34). Jesu banga midangte i lungsietna” khu Jesu nuazui ihina leh kitheichienna nielguollou ahia, chi imu uhi. Lungsietna nei khu Jesu um banga i umna uh poimaw pen ahi.

Jesu banga umna khat kia ahileh thuneina nuoi a “kituhlutnan” ahi (Luk 2:39-52). Sungah Jesu anaupanlai a kipat kum 30 achin tana, innsung a aumlaisie anu-le-pa, Mari leh Joseph thuthu a aum thu i mu hi. Kei Pasian tapa nougel nupa nelnul thunuo ah ka kuun sih ding chi’n tulai nungah tangval tampite umdan in aum sih hi. Kei khu Vanlam mi ka hia, nou leitunga tengte sie-tawi bangin ka tawi hilhel sih ding, chi’n zong Sorkar-te thuniel in zong a pang sih a, sie bang atawi hi (Math. 17:25-27). Tami zong Jesu ibatna dinga kihilna poimawtah ahi hi.

Tualeh tamte lou zong Jesu banga umna ding aum nalai ding a, tuate khu tu leh tu in igen mansih ding uhi. Jesu banga “Sawia, gawt a um” ding bang in (Johan 15:20) ah Jesu banga Hagau man ding bangin (Johan 17:18) ah ang hil hi. A tawpna pen ah nikhat ni chiengin ishi dinga, hinanlezong bangchih ni ahei chiengin Ama bang in kaithou in i umta ding uhi (Late 17:15) na in, kei ah dihtatna nei in, na mel kamu ding a, nangma batna nei a ka khahlaw (tahsa thawkiani) chiengin ka maitai ta ding hi”, achi hi. Gingtute khu Van khawpi (Jerusalem) tha ah Jesu bangin loupina tahsa mel toh kumtawn a Mangtouppha tunga tou a, Ama toh vaihawm ding ihi chi (Kih. 3:21) na in ang hil hi. A nop ding dandan khu loupni na va-ia tei ve!!

Tuajieh in unaute aw michin in Jesu umdan banga um ding in “i kichiel” uhi.

.....

HING NA THUMPI ZEL UN AW

Ka min KEDAR OJHA ahi. Hindu sakhuo a Kuulmut mama siempu innkuon sunga pieng khie kahi. Ka khuo ahileh Nepal gam lailung ah um a, Unau Numei - 4 leh pasal 2 te lah ah naupang pen ka hi. High School ka kai lai in lawmte toh kithuo in khamthei sal ah kana taang kha hi. ka khamthei bawl kipat tung in pen a nuom a, nopsahna tah khat zong ka nei hi. Hinanleh i zong sang tahtah chiengin anopna abei a, alouthei loua poimaw ahing suohta mai hi. Khumbang a khamthei sal a taang ka hi chi selzaw guollou a hing hi chieng in ka khotaang ah ka lawmte leh ka innkuonte mama in a hing dei non sih ua, ahing pampai uhi. Khum bang silte ka hing tuoh chiengin ka thawmhau mama a, zauna in ka pumdim a, ka hinkhuo in lampi dihlou zuikha ka hi chi ka kithei khie hi. Ka ki heng lamdang ut a, lampi dih leh tang ka zui ut mama mai a, hinanleh ka zekai sengta ! kihen lamdanna ding lampi himhim ka mukhe zouta sih hi. Tam bang ahiman in ka gim mama a, lam-et ding bangma nei non hetlou in ka ki thei hi. Khumbang dinmun a um a ka hinna subei mai ding ka tup laitah in Bus a ka tuon leh tam Bus sung ah Khristiante laigel themkhat ka mukha hi. Tami laigel ka sim leh ka hinna ah khovah khat hing vah kiau hi. Khum laigel ah damdoi khamthei bawl zongsangte khat a hinkhuo “Jesu Khrist in a bawl hoi sah tanchin kigiel nalai hi. Tam laigel sung ma ah “Jesu Khrist in hinna tha hing pethei a, Aman i tunung a ding lampi tha hing kohmu thei hi” chi akigiel hi. Bible tang akigiel a, “Nou semgim leh puohgih pawte zousie aw, ka kung ah hing pei unlen, keiman khawldamna hing pevang (Matt. 11:28). Tam laigiel ka sim a kipan kei ding a Mang Khrist a lam-et ding leh

khawlna ding um thei ding bang in ka mu a, tuachi'n Ama sui ka kipanta hi. Kum 2010 July 24 in ka damsung a amasa pen ding in Biehinn ah kava kaita, hinanleh ka innkuonten ka Biehinn kai a thei un deiteelna hun ang pepai uhi. Biehinn kai topsan vengveng ding ahisih leh inn nuosie vengveng ding chi ken inn nuasie ka teel zaw a keima hinhin a hing dingin Mumbai ka zuon mawh hi. Mumbai a kava haw leh khum mun ah YWAM (Youth with a Mission) te kava mu a amauhte apat Khantanhoi chieng zawsem in ka thei hi. Tuachi'n October 26, 2010 niin Jesu keima Mang leh Hundampa dingin ka saang a, tam mun ma ah Baptisma ka tang hi. Khumni a kipan Khrist ah HINNA THA ka neita hi. Pasian "Ta" ka hing hi a kipat Khamthei sal a kipat in ka suohta ta hi. Hun peisa a ka thei ngai hetlou KIPAHNA, HAMUONNA leh SUOTATNA Jesu Khrist in ahing pie hi. Ka hinkhuo a katup pipen, ka hinpipen ding Aman ahing pie a, tampen Ama nnasep ahi. Tuaziehin ka damsung pumpi Pasian nna sem nuom kahi man in khumte dia ka kisahkhawlina in kum 2012 apat in GBC ah Bible ka hing zil hi. Khum ka zilna ka zaw hun chiengin Mangpan pha asah leh Khantanhoi kigen khahngai louna mun ah Pasian nnasep ka ut hi. Tua ahiman in ka testimony tomnou kang gel ana simkha pouma kung a ka hing ngetnuom ahileh ka maban ding Pasian kung ah hingna thumsah dingin ka hing ngen hi. Kum 2013 a kipan Pasian in kapa lungsim hing henglamdang sah a tuin ka pa'n ka inn sung uah lut hing phalsakta hi. Tampi vei tah ka inn uah kapei ta a, ka innkuonte kung ah Khantanhoi ka gen zel hi. Hinanleh tunitan in akipah huoi (answer) ka nga naisih hi. Tuaziehin ka innkuonten Jesu anei ua, Khristian ahing suohna ding un zong hing na thumsah un aw, Pasian mai in thupina tang taken".

Ruth Messenger May-June 2017 issue apat lahsawn.

.....

ZPWF Column:

2nd November, 2017 to 22nd October, 2017 tan a

TUNNU LIMBEL PANPINA PETE

1. Upa K. Mangpu, Sangaikot	Rs. 100
2. Upa Khupchinzam, Awnchinkap khuo.....	Rs. 200
3. Nu Chingkhanngai, V. Bethel	Rs. 100
4. Rev. Zamlianpau, Lailamveng	Rs. 1,000
5. PWF Sangaikot Anntang Kg- 50 &	Rs. 50
6. PWF Shillong	Rs. 3,000
7. PWF P.N Khovong Anntang tang	Rs. 500
8. PWF Sugnu	Rs. 1,050
9. Pa Ngulzagen, Aina	Rs. 500
10. Nu Chingzaniang, Zomi Colony	Rs. 500
11. Nu Cicy Vungneiching, Central Church	Rs. 3,500
12. Nu Dimneiching, Central Church	Rs. 500
13. Nu Zamneihat, Central Church	Rs. 200
14. PWF Imphal Anntang Half bag 2 &	Rs. 400
15. Young Learners' Staff & Students apat panpina	Rs. 10,000
16. Nu Chinghauniang, Central Church	Rs. 100
17. Nh. Kimbuang, Tuining	Rs. 100
18. PWF Tuibuang Anntang Kg 110 &.....	Rs. 100
19. Nu Vungdeiching, Behiangjang	Rs. 100
20. Nu Mannianching, Lailamveng	Rs. 500
21. PWF Behiang Anntang	Kg- 60
22. PWF New Zoveng Anntang Kg- 70	
23. PWF Zoumunnuam Anntang Kg- 33	
24. Nu Chinggouman, Thingkangphai Anntang half bag - 1, Chini Kg-5, Dal Kg-5, Chapati Pava -1	

.....

PATRON MEMBER-TE

1. Upa Gouzamang	2. Pu Hav. Khamchinkhup	3. Pu Khamzalam	4. Pu Chinzasuan
5. (L) Upa Liansuanpau	6. Pu Khamchinthang	7. Pu S.Dalthang	8. Upa Kapkhanthang
9. Upa Langginmang	10. Upa S. Nangkhanlal	11. Pu S. Lamkhotang	12. Upa Dr. M. Lachinkhai
13. Upa Khamchinjam	14. (L) Upa D.K.Manlun	15. Upa Suankhanmang	16. (L) Upa Khupgou
17. Upa Chinkham	18. Upa Ngulchinkham	19. (L) Rev. V. Vungzalian	20. Rev. Retd. Kamkhosoi
21. Rev. Tualzachin	22. Rev. (Rtd.) H. Nengzaton	23. Rev. Awnkhankhup	24. Rev. Dr. Hangpi Manlun Zou
25. (L) Pu Tuanzapau	26. (L) Rev. Ginchinjam	27. (L) Rev. Khamzasuan	28. Upa T. Lamkhotawng
29. Upa Khaichinmang	30. Rev. Stephen Chinzathang	31. Pu Khupkhanmang	32. Pu Khaidohlian
33. (L) Hav. Khamzahang	34. Pi Vungzanuam	35. Pu T. Gouzadou	36. Upa Liensuonkap
37. Pi Zelkhochiin	38. Pi Hatkhanvung	39. (L) Pi Ngaihoiching	40. Pi Mankhannieng
41. Pu Goukhanmang	42. Pi Chingzalam	43. Pu S. Thianzakhai	44. Pi Kamkhanching
45. Pu Haukhanpau	46. Pu Tuallianmang	47. (L) Pu Dongkap	48. (L) Pi Chingkhanmang
49. Pi Donkhonian	50. Upa Henzakhup	51. (L) Pu Saichinpau	52. Pu Goumang
53. (L) Upa Khamkhanhang	54. Shie Laangkhanlal	55. Pu Khamkhanlun	56. Upa L. Tualkhanpau
57. Upa Jamsianmung	58. Upa Ginzadong	59. Pu Kaizathang	60. Pi Goizanuom
61. Pi Thangneivah	62. Pu Khamzathang	63. Pi Donchin	64. Upa Liankhanmang
65. Pu Hauchinlun	66. Pu T. S. Lal	67. Pi Goichiin	68. Pu T. Khupchinthang
69. Upa T. Kaizalam	70. Pu Paul Henkholal	71. (L) Pu Soikhham	72. Rev. P.C. Manga
73. Rev. Khamchinkhai	74. Rev. Jamlianpau	75. Rev. Chinzapau	76. Rev. Retd. Kamkhozam
77. (L) Upa Chinpu	78. Pu Zamkhanthang	79. Pu Chinglen	80. Miss Chinhaunieng
81. Upa P. K. Soia	82. Pu Goukhai	83. Pi Niangkhanmang	84. Evan. Retd. G.L. Joshya
85. Pi S. Chingkhanmang	86. (L) Pu Vumchinkhup	87. Upa Khaihenthang	88. Upa T. C. Pau
89. Upa Nengchinkap	90. (L) Upa Jamkhongam	91. Upa HT Manga	92. Mrs. Vahkhohling
93. Pu Hauliankap	94. Pi Chinnu	95. (L) Upa Ngulzakhai	96. (L) Upa T. Gougin
97. Pu Ginsuanhau	98. Pu L. Langminthang	99. (L) Rev. David K.Samte	100. Upa T.S.K. Samte
101. Upa S.K. Khama	102. Pu Jamkhopao	103. Pu Thathang Taithul	104. Pu Kamkhankap
105. Bhim Prasad	106. Rev. M. Kapsuanthang	107. Nu Chingneikim	108. Rev. Khupkhausuan
109. Pi Mannuamching	110. Rev. Kaimuanlal	111. Upa Nengkhanlian	112. Nh. Deborah Zou
113. Pu T. Kuppaa	114. Rev. Mangsuanthang	115. (L) Pu Lamchinhou	116. Upa Pauchinlel
117. Nu Kimneihoi	118. Upa Kamgenpau	119. Nh. Niangsuannuam	120. Nu Ngaikhanvung
121. Pu P. Sanjiv Zou	122. Upa M. Kaichinkham	123. Upa T. Sianchinpau	124. Upa Sianzahau
125. Pu L. Thenkhosoi	126. Pu Kamsuanhang	127. Upa Th. Kaikholam	128. Upa Lunchinthang
129. Pu P. Tongthang Zou	130. H. Nehzamang	131. Pu Thangsuankhup	132. Upa M. Kamzadou
133. Pu Jamkholian Munluo	134. Pu Sianzakhai	135. Upa Thanggingsuan	136. Evant. Bhim Prasad Ghatani

LIFE MEMBER-TE

01. (L) Upa T. Khupkenpau	02. (L) Pu M. Ginzahau	03. (L) Pu Selzapau
04. Pu L.C. Pautungnung	05. (L) Pi Khamkhannieng	06. Pi Ngaiuom
07. Pu Chinsuanthang	08. Upa Shanti Kumar	09. Pu Kamkhohau
10. (L) Pu Khamkhohau	11. Upa Khamzathang	12. Upa Chinkhanthang
13. Pu Tongzathang	14. Pi Chiinneilam	15. Upa Kulthang
16. H/Sm. Upa Kaichinpau	17. Pi Niangzalam	

Undelivered

Please return to:

The Editor

KHRIŒTIAN TANGKOU

ZPCS Office, Zomi Colony

Churachandpur - 795 128

P.O. Box - 48, Manipur, India

Synod Office Telephone No. (03874) 235105

Website: zousynod.org | email: info@zousynod.org

zpcs@rediffmail.com/zousynod05@gmail.com

7a,
